

Ujunere Jamma e Jamma Gooto



Les Mille et Une Nuits

E booyde Saasanii'en, laamu Peerse kiidngu, carinoongu e nder Enndo, hodnoobe e lugge mawde e tokoose dee kala, ko buri woddude Ganje haa to Siin. Ndeen wi'aama ina wadnoo laamdo e dee doon kodorde, ko burnoodo teentude e laambe e oon sahaa.

Omo wadatnoo kala ina weltina e haalaaji mum, ganndal mum e reentaade mum, ko duum wadi omo hulbina hoddiiɓe makko, sabunde haaleede ngalu makko e ganndondiral makko e cente cente hatanteeɓe jannguɓe. O joginoo ko biɗɓe diɗo: afo, bi'eteedo Sariyaar, teddudo e ndonu baaba makko, omo joginoo sariyaaji keewɗi; koddaajo oo noon wi'etenoo ko Sajenaan, oon ne ina joginoo bural (gannde) e dow mawniraado o.

Caggal laamaade ko juuti e ndimaagu, laamdo oo hono baabiraado oo maayi, Sariyaar heɓbitii jappeere laamu nguu. Sajenaan, yalti e kala peccooru mbaɗfiraangu

ñaawooje laamu nguu, ko duum sabobini, omo foti
wuurde kanke gooto, e dow leetude mawniiko e kala
moyfere makko, reentoo kadi e kala ko ina metta dum.
O hebii cadeele seeda e kebgol sago makko (serindaade).
Sariyaar, e dooftaade laamdo o, holli yidde feccude gure
dee hakkunde mum e miini mum. O rokki dum laamorgo
Taartari-Mawngo. Sajenaan, doon e dumunna dabbo
yahi hodooyi, o siŋcoyi to Samaarkande wuro laamorgo
ngoo.

Wadii duubi sappo, caggal ko bee laambe dido ceerti, e
oon sahaa Sariyaar yeewnitii miini mum haa burti, fewji
neldugol dum jaagorgal makko kalfinangal ko faati e
jokkondiral leydeele, mbele omo ara yi'de dum. O subii
oon Jaagordo ko e fedde ardiinde laamorgo ngoo, fedde
burnde toowde, o yahdi e dooftaare laamdo oo no haaniri
ni. O wadi ko yaawi ko yaacci.

Nde o ari haa o faandii Samarkande, Sajenaan, sooyinii mo
hedtini mo, yaawnii e jottagol makko. O yalti ngam
jabbaade mo kanke e watulaabe makko, been e dooftaare

mawnde ebe ñaantii haa yoodi. E weltaare mawde,
laamdo Taartari jabbi mo, teddini mo, ndeen naamni mo
kabaruuji paatudi e mawni mum. Jaagordo oo e heppude
anndondirde e be wayri e gite mum, o jantii fof ko addi
duum. Sajenaan weltii haa ko doo, tan weltaare haadata.
O wi'i: Jaagordo nuundudo, mawni am laamdo oo, omo
wadana mi teddule keewde. Etee a waawaano addude do
ko furi dum doo welde.

So tawi mawni am oo du'ii ko yi'de mi, mido heppatnoo
oo duwaawo. No o nanngiri kam ni, ko noon minne
nanngir mi dum, sehelaagal amen ko ko duumotoo.

Leydi am ina deeyi, kadi mi rokkii on balde sappo wonde
e wuro am, mbele mi waawa hebaade no en njahdiri.

Dum noon jaraani ko ada wona doo waktu dabbo. Wadde
noon ndarnee doo tillisaaji mon, mi yamirat jooni jooni
yoo on ngaddane ñaamde e njaram mon. Duum wadaa,
hono hojom taw fof gasi.

Laamdo oo naatoyi Samaarkandee, ngam hollude yimbe
mum nuldal ummaade e mawni mum.

Ndeen yonti Sajenaan, haljitii hebaade, yamiri cukko mum yoo ardo laamu makko, nde wonnoo omo hoolii mo, omo horsini dūm, kadi ɓe keddo e jamirooje makko, haa nde o arti fof. Ñande so weeti tan ko ɓe yahatɓe, o subii yahdiibe makko, o waynii joom suudu makko. Nde yahi haa hiiri o yalti Samaarkandee, kanke e yahdiibe makko dangal. O yahi to tillisa makko, mo o darnunoo e sara tillisaaji Jaagordo o. O woni e yeewtidde e maɓɓe haa jamma jenngi. Ndeen o yidi kadi uurnoyaade joom suudu makko, hono debbo laamɗo mo o yidi sanne, o ruttii too galle to kanke tan gooto. E laawol makko poortitngol fa'de to debbo mo sikkaano ina yi'a dūm e oon waktu, noddii gooto e watulaabe makko. Taw booyi ko ɓe lelii haa ɓe daaniima doyingol luggol.

Laamɗo oo naati e teeyre, omo sikka o juukat debbo makko ina wondi e yeeweende, e miijooji ummaade e makko, e gilli aduna yoo laakara. Kono ko owni ɓernde laamɗo nde, o tawi jaynge huɓɓatnoonge nder galle, nge

meeda ñif, wadaani hay pooyel, hay e nder suudu debbo
laamɗo oo. O yi'i gorko ina lelii sara debbo makko, o
dartii, o yeewi ɓe ko juuti, e waasde sikkitaade o wi'i:
« Ko waawi mi heɓde fof kam wona e laamorgo am
ngonmi, cikku mi tan ngon mi ko e yaweede! Ah
kudaado! Aan a waasataa halkeede. E wonde mi laamɗo,
potmi ko halkude saaysayeeji naatɓe e leydi am ndii fof.
E wadeede gorko leefnaado, oo kam mi warat ɗum tan,
mi usta mette.» Doon tan laamɗo o foodi labal makko, o
ɓadtii lelnɗe ndee, e soppannde wootere ɗoyɗi maɓɓe
ngonti maayde.

Caggal ɗuum o ɓamiri ɓe gooto gooto, o weddorii ɓe
falanteere e ɗo ɓe mboppannoo tuundi maɓɓe.

O haptoriima hono ni, o yalti wuro ngoo, hono no o
ardunoo ni, o naatti e tillisa makko. O yottii ko ɓooytaani
taw hay gooto o haalanaani ko o waɗi koo, o yamiri yoo
ɓe ndenndindin tillisaaji ɗii eɓe njaha. ɗum waɗaa ko
yaawi, kadi siwaa weet, ɓe nanngi laawol e yahdude e
baggi e liite kollirooje weltaare mawnde ndewi e laamɗo

oo. Oo laamdo e sunaare bargol joom suudu makko,
addanii mo jiibaare nde yaltaani dum hay gootol e nder
dannal makko.

Nde be ngari haa be badtii laamorgo Enndo, o yi'i ebe
ngara e wondude e laamdo Sariyaar e yeeso mabbe.

Weltaare nanngondiri hakkunde laambe bee; nde be
njottondiri, kambe dido bee fof, be telli e leydi be
mabbondiri; be mbaditii pucci mabbe dii be naatoyi nder
wuro e sukkondirde e kuljinaali yimbe heewbe. Laamdo
oo reggondiri e miñi mum haa nder galle makko, to
suudu ndu o heblannoo dum nduu. Nduun suudu ina
uurnaa ina sinkaa haa jalbi, kadi ndu darii ko e sara
ngesa besnooje; ko doon be keewi wadde welnere e
pijirlooji mabbe. Sariyaar yalti, haa o lootii, o bami comci
makko goddi laabdi; o anndi jooni kay o yalti, o arti. Be
njoodii e jappeeje mabbe daadde, watulaabe mabbe
ngoditii be, sabu nde dooftaare mabbe. Laambe dido bee
ngoni e yeewtude, hono no jiidube yiyyam ngondirta ni,
kadi sehelaagal mabbe ina mawni sanne, kono ko be

wayrondirbe. Nde bottaari yonti, be ñaami haa be kaari,
be njartii njaram maɓbe beldam buuɓdam, ndeen be
njokki e jeewte maɓbe haa hiiri. Nde yahi haa jamma
jenngi, Sariyaar yalti acci miñi mum lelii, mbele omo
foofta.

Sajenaan kiitaado lelii daanii; kono so mawni mum
waaldiino e makko dum ustananno dum kulhuli, doon
seeda tan o ummii o giddi. O woni e fawndindirde
mijooji kulbiniidi nde wonnoo sago mum ko daanaade.
Maayde debbo makko ndee horiima yaltu e bernde
makko, haa o seerti e sago makko. Caggal duum o ronki
daanaade, o ummii o woniri noon haa weeti; nde mawni
mum yi'i dum tan o sikkitii. «Hol ko heɓmaa laamɗo
Taartari? Hol baɗɗoma ndee sunaare nji'at mi e yeeso
maada? Maa taw ko jaɓɓungal am ngal woni ko
feewaani? Alaa: miin keɓɓori maa mi kono miñi am mo
ɓurmi yidde, mbaar alaa ko mbat mi ko feewnitaaki ma.
Waastaa noon ko ko o woditii koo gure makko walla joom

suudu makko. Ah! So tawi ko duum jiiɓi dum, mido foti
wadde ko yaawi, mbele mi hawrindina kala ko podannoo
mi dum, mbele kala nde o sokli o ruttitoo

Samaarkandee.» Doon e janngo mum tan o renndindini
kala e ko ɓuri njardude e ngalu enndonaabe. Sariyaar
dartinaani waajaade mo e yeewtude mo, haa o heɓta
hakkille makko. Kono duum fof e yahdude e pijirlooji
maɓɓe hadaani mo jiiɓaade.

Wadi ɱalngu gooto Sariyaar fewji baaɱoygol doon e wuro
ngoo, leydi ndii endi heewi lelli. Sajenaan ɱaagii mo
yaafuya, ngam waasde yahdude e makko waaɱoore, o wi'i
cellal makko heewaani. Laamɗo oo noon e aɱde
luutndaade miɱi mum, acci mo o heddii doon kanke tan
yahdi e watulaabe makko. Nde ɓe njalti, laamɗo
Taartari-Mawngo heddii e yeeweende naatti nder suudu
uddi. O udditi falanteere wootere, o woni e ndaardude
doon ngesa besnooje baa, doon ko nokku njootɗo, baɗɗo
colli jootɗi, e diwngol eɗi njaha, eɗi ngara, dum weli
duum, kono dum fof dey hadaani debbo o ina arta e

hakkille makko, o yowti gite mum e ngesa hee, o woni e ndaarde asamaan, omo fela hoore makko.

Omo ndaaratnoo do gootel e asamaan oo, tan haa woodi ko dillini dame galle dee, dame dee nguditii fotde rewbe noogaas njalti fa'de e gesa baa. Taw ko debbo laamdo oo e horbe makko njalti doon lootoyaade to ngesa too. Oon debbo laamdo e sikkude laamdo Taartari-Mawngo oo, ko jahdudo e mabbe waañoore, rewti do yeeso falanteere laamdo doo, oon noon e yidde laabeede mo, o darii e do o waawata yi'de huunde kala, taw yi'etaake, omo ndaara dum. O anndi kam dewdo oo e laamdo debbo oo, ko badanoowo mo huunde kala, ittani mo comci makko haa heddii ngudoñ ndañoñ koñ. Omo sikkatnoo ko rewbe bolbe ngoni doon, tan haa o yi'i watulaabe worbe sappo ina ngondi e boomi mabbe. Debbo laamdo oo ne booytaani doon taw nanngondiri e gorko, o fobbindiri juude omo wi'a: Masuud, Masuud!

Tan haa gorko goddo jippii doon e leddal dogi fa'de e debbo hee ina weltii.

Ko benni koo hakkunde bee rewbe e bee worbe welaani fillaade, sabu dum welaani haalde. Ko yidde anndin tan wonde no Sajenaan kam yi'i fof ko haali taw mawni mum yeddidtaako. Mbelemma ngal doo kawral yidondirbe juuti haa hakkunde jamma. Ebe nguuldotonoo e beelal mawngal burnongal sinkeede e nder ngesa baa; nde duum benni, be bami comci maɓbe rewbe bee naatiroyi to damal suudu laamɗo to; Masuud noon diwrunoodo dow tata gesa to, rewti do rewnoo.

'Dee doo gede fof benni e yeeso laamɗo Taartari–
Mawngo, de beydani mo miijooji di ngasataa.

O wi'i: «Ndeka mi fotaani sikkude, ko miin tan hebi cadeele, sikke alaa ko dum pottudum worbe fof, sabu mawni am laamɗo, laamiido gure keewde, burdo toowde e laambe aduna bee fof, horiima salaade dum. Ko mbatnoo mi koo noon ko kiite ngondunoomi! Kono diin miijooji ngontaa kam jiiɓ hakkille e kedde aduna am.»

He oon sahaa, o natti sunaade; o yidaano ņaamde e oon waktu, kono nde oo doo tiiyaatiir benni e sara makko, e yeeso makko, o ņaami ko o meedaa ņaamde gila o ummii Samaarkandee, kadi o nani welnere ina jogori wadeede ko booyata e wuro hee.

Ŋalngu dewdo heen oo, o heɓti hakkille makko o jirwi; kadi nde o nani mawni mum ina arta, o jaɓɓoyii dum dow laawol omo jerfa dum. Sariyaar, ko ardii, tuuknaaki e ko o waklii ko, o songitii dum ko haɗnoo mo yahdude e makko waaŋore; o salii fadde haa o jaaboo haala makko kaa, o haalani dum kawral lelli e kulle godde, de ɓe mbari e weltaare nde o daŋi nde. Caggal nde Sajenaan hedtii mo no moyyi, heɓɓitii haala kaa w'i:

Nde wonno o aldaa hanƙadi e sunaare jiiɓnoonde nde hakkille maa ko juuti, o haali fotde ujunnaaje gede belde beltinooje.

Laamdo oo noon e sikkude tawtat waaji oo do wonnoo, weltii e yi'irude dum yeeso weltaare. «Miŋi am, oo wi'i, mido jaara Alla woŋcitaade ma e yeeso laaɓngo, nde o

wadi e ma caggal am; so ko goonga mido weltii, kono won ko ñaagoto maa mi, kadi mi juurimaa ma yoo a jaɓanam ko mbi'at maa mi koo.

– Hol no mbawirat mi salanaade ma? Laamɗo Taartari oo jaabii. Aɗa waawi fof e dow Sajenaan. Haal; Mido heppi anndude ko coklu ɗaa e am.

– Gila nde naat ɗaa e dingiral am hee, Sariyaar heɓɓitii w'i, mi yi'i e maada mbaadi e mette baleeje, ɗe koranii mi ittirde kala ko ina weltiniree. Mi sikkii hay ko ko ngodɗitidaa ko gure mon walla debbo maa jontaado oo, ngondo to Samaarkandee saabinoo dum. Mi anndaa fof ko feewaani ko mbaɗnoo mi; Haɗnoo kam haalde tan ko hulde hade a mettin. Jooni noon, mi tawtiima aɗa e nedɗaagal maa burngal timmude, aɗa weltii ete alaa fof ko nganndu mi heen, hakkille maa ina yalti e ɗee mette baleeje haa laabi. Tinno haalanam ko saabinoo aɗa sunroo nii, kadi ko wadi jooni a seerti e ndee sunaare.»

E ndee doo yeewtere, laamdo Taartari–Mawngo deyfinii
ko juuti ina miiyoo, wa'i no yeewatdo ko jaabii mo.

Ndeen be njaabondiri dii konnguli:

«Ko aan woni laamdo am, kadi ko a ceerno am; wadde
mido ma ñaagii yoo a welto e kala ko ada kam naamnoo.

– Alaa miñi am, laamdo oo jaabi, wi' ada kam dum foti
jaban; mi yidaa calanodaa kam.»

Sajenaan ronki luutndaade jamirooje Sariyaar. O wi'i: «Ah
mawni am, wadde mi jabanii ma, sabu a yamirii kam.»

Ndeen o siimtani dum haa laabi ko o wadnoo debbo
makko to Samaarkandee; nde o gasni haalande mo, o wi'i
ko dum taknoo sunaare am; ñaaw so tawi ko mi tooñyo e
seertude e makko.

– Ah miñi am! Laamdo oo jaabii e daande holliroore
njurum laamdo Taartari, a fillani maa ma kam gacce
kersiniide!

Hol fof no mbaawir mi hedaade dee gacce haa ngasi!

Mi rokki on yamiroore halkude kala taƴotoodo, kadi ko
mi jobboowo kala baddo dum; sabu dum moyyaani. So

tawiino ko miin, wonata no wonki debbo gooto ko ngittat mi. Ko mbaɗɗaa koo haawnaaki kam hay seeda: «Sabu ko nji' daa koo ina wara gilli. Ah Alla! Ndaw ko hulɓinii! Mi meeda ɗamino hono ɗum ina heɓa neɗɗo, haalaaka kam aan oo. Kono noon haɗkadi yettu Alla e ko seerndu maa koo; e oo ɗoo debbo, nde wonno mi sikkaano ɗum ina ma fodanee, kono welto e ko njanngindaa kam koo, waɗan am ɗum sirilu.»

Sajenaan ɗañii caɗeele e ndee ɗoo toɓɓere beydaade e ko ɓenni koo, e yiɗde laɓɓinande mawni mum ko o naamnii mo koo; kono o woppi miijo salaade mo.

« Waɗde mido ma haalana, sabu ko ɗum ɓuran maa; mido sikki tan so mi haalanii ma, ɗum waɗantaa ma caɗeele, sabu ko aan ɗuɗi mi e haalande ma ko miijinoo mi yejjitde haa daaɗaa e nguurndam am.

– Sariyaar wi'i ko puɗɗiɗaa koo haalde beydanii kam kumpa; waɗ ko yaawi kaalanaa mi oo sirilu e hol foodoore ɗum woni.» Laamɗo Taartari horti nanngude hoore

makko, o haaliri gootel gootel haa ardi gila e paaykinagol
baleeɓe ngol, haa e jaltugol debbo laamɗo o kaŋum e
horɓe mum; o yejjitaani hay Masuud. «Caggal nde o
seedti dee gede kersiniide, o wi'i kadi, mi sikkatno rewɓe
fof ko nuunduɓe mbaawa haɓde e tedduɗo. Ngoo doo
miiɗo addanii kam wi'de ko leefre tan gorko wondata haa
wi'a ina sakko debbo. No mbaɗnoo mi ni, ko noon tan
seerndata kam e dee ŋawande. Noon tiidiriino kam, kono
mi waɗno tan, kadi so tawi aɗa kam hoolii, rew do ndew
mi doo.»

Deentinooje dee laabi, laamɗo oo ronki naatde e majje.
O naati e tikkere. «Ko mbi' ɗaa koo, debbo laamɗo
Enndo o ina waawi yeeyde hoore makko e ko aldaa e
gacce! Alaa, miŋi am, koolorat mi ko mbi' ɗaa koo tan,
ko mi yi'a ɗum e gite am. Huunde ndee ina haani mi
laaɓee nde miin hoore am.

– Mawni am, Sajenaan jaabii, so a yidii seedtaade ɗum,
ɗum tiidaani: a waɗat tan kadi ŋalngu waaŋore woɗnde,
so en njaltoyii wuro ngoo e wondude e watulaaɓe men,

ndartoyo den to les tillisaaji men, so jamma jofi enen
ndutto den wuro to suudu am too. Mido felliti so weeti a
yi'at ko nji'noo mi koo.»

Laamdo oo jabi ko haalaa koo, kadi yamiri waañoore
wodnde; ñande heen tillisaaji dii ñiboya to wi'aa too.
Ñalngu dewdo heen oo, laambe dido bee fof njahdi ina
ngondi e watulaabe mo'en. Nde be njottii do be potnoo
haɓɓitde, be ngoni doon haa jamma. Sariyaar noddi
cukko makko oo; o yamiri mo lomtaade mo taw, o
haalanaani mo ko o waddata koo, kadi hay gooto wota
yaltu, hay so tawii ko haaju mawdo.

O rokkii dee jamirooje, laamdo Taartari–Mawngo e kanke
be mbaɗɗii pucci maɓbe, be njalti nokku oo, taw be
ngannditaaka haa be naatoyi wuro, be keboyi to suudu
Sajenaan. Be leeli haa weeti, subaka law be ndaroyi do
falanteere laamdo Taartari ndaardannoo baleebe bee. Be
ina kaalatnoo tan haa be nji' damal kaɗangal ngal ina
udditoo, debbo laamdo oo yalti e wondude e baleebe
sappo ina muurnii; debbo o noddi Masuud; eywa laamdo

o yi'i ko waamti ko fillanonoo koo gacce. « Aah Alla! O luuki, ndaw gacce! Ndaw kuddi! Hol no joom suudu laamdo, hono am waawirta wadde dee gacce? Aah! Miñi am, oo woni e maɓɓaade laamdo Taartari, enen dido bee fof kolliten aduna oo, wondeno ngilngu bernde waraa ma; sabu so feewni doo tan, janfoyto too. Mboppen gure men e kala ko badii en. Njahen gure janane nguuroyen toon e suuraare.» Sajenaan salii ngoon miijo; kono ronki ittude dum e fitina. « O wi', Mawni am, mi jabanii ma e teddungal; mido felliti rewde e maa haa e kala do welmaa; kono daaminano mi wondeno en ngartat, so en kawri e burdo en mettireede.

Laamdo oo jaabii, wi', mi fellitii; kono mi sikkaani so eden kawra e jaasdo en. – Laamdo Taartari o wi' mi daminaaki so eden ngoddoya e ngal datngal men.» Be kaaldi dum be njalti galle laamorgo ngoo, be bamti laawol ngol be ngardunoo. Be ñalli yahde haa jamma ari be mbaali e les ledɗal. Nde fajiri seeki tan be njokki e yahdu maɓɓe, haa be ngari e cukkiri piindundi haa yoodi

ina e sara maayo, doon noon wadi ko cerekoñ seeda, e
ledde mawde dee. Be njoodii e les ledde mawde dee
ngam fooftaade e buubri. Be ngoni e yeewtitde ko faati e
rewbe maɓbe.

Be njeewti ko juuti, haa be nani sara maɓbe dillere
hulbinii ndee doo woddaani maayo ngoo, kadi dillere
ndee hebbini berde maɓbe kulol. Be ŋoonɗodii, be yeenji
leddal ngal haa collet be cuudii toon, ebe pooyoo to
dillere ndee wadiri too. Be nji'i to maayo too neddal ina
seeka ndiyam dam haa ngal hennitii e maɓbe.

Ko gooto e malkisaaɓe, leeptaado, kadi ko o gaño worbe.
Ko o baleejo butto toowdo, e ngal ronndii keesuwal
mbadngal cobbuli nayi, cokangal haa tiidi. Nde neddal
ngal yeenji, ngal jippinoyi keesuwal ngal les lekki, do
laambe be yeenjirta doo, be beydii bidtaade.

Neddal ngal joodii do les lekki doo, ngal udditi keesuwal
ngal, yaltini toon debbo ŋaantiido, jooddo haa alaa ko
nanndi. Ngali joddiini mbo sara makko ina ndaarda mbo

gilli: «Ngal wi'i, debbo ko aan woni burɗo timmu
njoodndam e rewɓe fof, ada ɗaati, aan mbo bammi yidde
gila e ɗalngu dewngal men, haa ɗaɗaa ko mi jidoowo ma;
ada yidi mi ɗaanoo seeda sara maa, ɗoyngol am ngol e
mawnude addii kam ɗoo ngam fooftaade.» Nde ngal
gasni haalde, ngal aciti ko'al makko mawngal e dow
koppi debbo oo; ngal forti koyɗe ɗe njahi haa ɗe tiimoyi
maayo ngoo, hono hojom tan ngal ɗaanii haa ngal waɗti
harde. Debbo oo hooyinii o yi'i laamɓe ɓee dow lekki too,
o fiinoorii ɓe junngo makko, yoo ɓe njippo ko alda e
dillere. Kono kulol haɗi ɓe jippaade ɓe mbi' debbo oo
yaafo ɓe o deyy'inoo; Debbo oo ɓamti ko'al waaji oo e
koyɗe makko jodɗini ngal e leydi, o ummii, o jaaborii ɓe
seeset e daande nde toowaani: "Njippo ɗee; ina moyyi
ngaron e am." Ndeka e piinaali makko o yidi hollir ko
nedɗal ngal ina hulɓinii, o wi'i: «Njippo ɗee ko yaawi
walla taw ko on saliiɓe, mi finndina mo, mi wi'a yoo war
on.»

Haala kaa jaaki laamɓe ɓee, ɓe ngoni e jipporaade jam
jam, mbele ɓe mbaasa findinde nedɗal ngal. Nde ɓe
njippii, debbo oo nanngi ɓe e juude, ɓe ngoditii lekki kii,
ndeen o wi'i ɓe, so ɓe njidaa, o jiiɓa ɓe, yoo gooto e
maɓɓe kala rokku ɗum feggere. Nii woni o heɓindiima
ɓe, o addoyi korel makko saabunnde; o yaltini toon
pegge haa keewi, o holli ɓe: « Odon nganndi ko woni oo
ngalu fof? ɓe njabii: – Alaa, kono anndin min ko ɗum
woni. – O wi'i: ko pegge worɓe ɓe nanngondirnoo mi
aadi ɓee fof ngoni ɗo. Eɓe njona cappande jeenayi e
njeetato (98) gorko ɓe njoganii mi siwoyneeruuji. Mido
on ŋaagii ɗe mon ɗee ngam timintinde ɗe teemedere.
Mbele mi waawa wi'de hannde mido jogii teemedere
giɗo, kono haa jooni ngal coofngal, malkisangal
woppaani mi. E ngal udda mi e keesuwal suudoya mi
nder maayo, kono mi dartinta janfaade mo. On nganndii
jooni kay debbo so jolaama, gorko mum e giɗo mum fof
mbaawaa hatde ɗum ko anniyii waɗde koo. Waɗde gorko
foti tan ko accude debbo e belaade mum waasa

lulindaade, haa annda sirilu mum.» Nde debbo oo gasni haalande be dum doo, o hebbii pegge maɓɓe deen ne wadtindiroyi de ede joginoo dee.

Debbo oo arti do o joodinoo doo, o ɓamti hoore goral ngal, fawi nde e dow koyde makko, taw ngal finaani ngal ɓoslitaaki; ndeen o wi'i yoo laamɓe be ndok be njaha.

Be ndutturii do be ngardunoo; nde be njahi haa be mbirnii debbo oo e goral ngal, Sariyaar wi'i Sajenaan:

«Jooni hol ko woni miiɗo maa e ko nji' den koo? Goral ngal wonaa puuntangal? A yi'i kam rewɓe alaa ko ɓuri be monikaade?

– Eey kay mawni am, laamɗo Taartari–Mawngo jaabii.

Kadi en tawii ngal goral kay ɓuri en leepeteede e fuunteede. Wadde eden poti ruttaade to gure men, sabu en keɓii ko yeewatno den, dum haɗtaa en haɗkadi resde. Miin kam, miɗo anndi no mbaɗat mi haa mi arta e do ngonnoo mi, taw gacce njaltaani heen; mi yiɗaa haalde dum joo, kono so a anndi dum maa a rew e yeruuji am.»

Laamɗo mawɗo o jaɓi feere miñi mum, be njawti, e

naatngol jamma tataɓo hawri ɓe njottiima e nokku ɗo ɓe ndarnunoo tillisaaji maɓɓe.

Gartugol laamɓe ɓee yeeynaa, watulaabe ɓee fof ngari to maɓɓe gila subaka law. ʼBe njaɓɓii ɓe njaɓɓungal teddungal, ɓe mbaɗni ɓe kala ko ina weltina nedɗo. O wi' ɓe alaa fof ko woodi, so wonaa ɓe koota to laamorgo maɓɓe.

Nde ɓe njottii galle, ɓe naatoyi to suudu debbo lamɗo too. ʼBe ɗeddi ɗum haa maayi taw ɓe kaalanaani ɗum bone mbo o wadi oo. Laamɗo oo noddii horɓe debbo ɓee fof, ɓe nanngaa, o hirsii ɓe fof, taw ko junngo makko o wadiri. Gasi ɗii ɗoo boneeji ɓenni, laamɗo oo waatii e yeeso maɓɓe haɗkadi, ko o cukkatɗo e miɗi mum haa daaɓaa. Laamɗo oo hebli Sajenaan haa weltii, ko o kootatɗo to Taartari–Mawngo.

Wonii Sajenaan hooti, Sariyaar yamiri jaagordɗo makko, yoo ngaddan ɗum mboomri ngardiindi harbiyaŋkoobe ndii. O ɗooftii ɗum. Ndi addaa laamɗo o leldii e mboomri ndii jamma gooto, kono janngo mum heen, tan

o wari ndi, o wi'i yoo o ndartanoye mboomri ngodndi.
Lulindare ari e jaagordo o wadde dee golle bonde, o debi
salaade yamiroore laamdo oo. Kono e ngol o addoyi ko
mboomri batulo mbo o anndaa e leydi ndii. Ndiin
mboomri ne, janngo mum heen, tan ndi waraa. Caggal
duum, laamdo o addanaa mboomri galo gooto ina e
laamorgo ngoo; ko nii tan o woniri, ñande fof ko
mboomri resaama, debbo maayi.

Ndee dillire war-hoore jaaki wuro ngoo fof. Nanetee tan
ko lukaali e goytaali. Doo ko baaba ina woya batte
mboomri mum njahndi ndi wonta yi'tu e gite mum; Kadi
gaa ko neeniraaɓe leefɓe hulanɓe di mo'en dii, haa ina
kaangaa bojji. Ko nii woni, ɓe keddi e kudgol laamdo oo,
kala sifaa hudoore taw ɓe potnoo tan ko ñaagaade mo e
juuraade mo, ngam woppude dee golle bonde de o
wadata ; ko ustaare tan beydotoo e laamu makko.

Jaagordo oo ko kanke woni cukko gardiido oo bone fof,
ina joginoo boomi didi, mawndi ndi ina wi'e Hoodere,
tokosiri ndi wi'etee ko Kanje. Tokosiri ndii ina heewi

teddungal, kono mawndi ndi ina yidi hoore mum batte ndewaagu mum. E ndi moyŷi hakkille kadi, ndi ina janngatnoo tinndi, doktoraagu, kam e lasli maɓɓe, kañum e njimri; haala mayri burnoo regaade e dow haalullaaji winndooɓe e oon waktu. E duum fof, e ndi wondi e mbaadi mawndi, e goongantaagal nganngal ngal e hakkille makko.

Jaagordo oo ina yidi mboomri makko mawndi ndii kaadɗi gilli. Wadiino ñande wootere eɓe njeewtannoo kamɓe diɗo, mboomri ndi wi'i: «Baaba am, mido jogii ñaagunde fa'de e maa; mido yidi jabanaa kam nde.»

– Baaba oo jaabii, mi waawaa salanaade ma, yoo taw ko nde jam.

– Hoodere hebitii wi'i: Nde ina doon waawi bur, kadi a ñaawat sabaabu gaddando mi naamnaade ma. Mido wakkilii ittude dee caɗeele de oo laamɗo wadata e dii galleeji wuro ngoo. Njif mi ko ittande ɓee neeniraaɓe, caɗeele pawaade e dow ko'e mo'en ko aldaa e daliilu.

Baaba oo hebitii wi'i: Miiɗo maa ngoo ina jogii nafaa, sabu

maa dum wallu neene maa, mboomri am; kono koo njid
daa ko ittude nanndaani e ko ittotoo. Hol no mbadataa
haa kuuftidinaa miijo maa ngoo?

– Baaba am, Hoodere jaabii, wadde e haala maa laamdo
oo ko badatdo dewgal ñande fof, mido woondi e ko
jibindaa kam koo, addande mo cadeele de o waawtanta.
Jaagordo o hedtii kaa doo haala fof; o wi'i: «Ah Alla!
mate kaa kaangaado, mboomri am? Hol no
ndu'arontodaa kam ko boni? Ada anndi laamdo oo ina
wakkilii leldaade e debbo gooto e jamma gooto, kadi
wara mo janngo e mum heen tan, aan mbi'a yoo mi rokku
ma mo, o res maa? Aan ada anndi ko kaalataa?

– Eey kay, baaba am, mboomri ndii jaabii e
goongiyanakaagal, mido anndi fof bone ngondo e dow
mum, o waawaa falaade mi. Mi tayiri ponndu mi heen ko
maayde am; kono so mi hebii foolde mo, leydi ndii
seertat e cadeele.

– Alaa, alaa jaagordo o hebbitii wi', kala ko mbaaw daa
ardinde mi taw dum ina nafa mi, mido heen fotndi e

wonki am. Wota sikku so mido ma luutndoo. Kono so laamdo oo yamirii kam yoo mi yuw ma laɓi e bernde, Aah mido dum foti dooftaade dey! 'Dum noon ko golle bonde wonande baaba; so a hattanaani maayde tan, hattan yi'de baaba ma ina tay'a junngo mum ina wondi e muuseeki maayde.

– Hoodere jaabii, kadi mido ma ŋaagii yoo aa jaban am ko naamni maa mi koo.

– Jaagordo oo wi'i: Natre maa ndee noon ko nde beydanat nde mi tan fitina. Hol no mbaawir daa dogde ada sukka e ustaare maa? So neddo laarata ŋande peccagol dental bonngal, fotaani naatde e ngaal dental. Mido huli hade ko heɓnoo koo mbabba heɓ ma, duum ina moyɣunoo, kono taw waawtanaa dum.

– Baan mbabba dey mimsitno? Hoodere jaabii.

Jaagordo oo heɓbitii, wi'i: Mi haalanat ma dum, hedo kam.

Ko Mbabba e Ngaari e Julanke

Julanke galdudo ina joginoo cuudi keewdi to winnde makko, ko toon o duratnoo jawdi makko keewndi. O yaltidi e debbo makko e sukaaɓe makko fa'de to binngel too, ngam hisnude hoore makko. Omo joginoo sirilu nangol ko kulle kaalata; kono e wa'de noon fof, o yidaa anndinde hay gooto sirilu makko, tawnoo o yondinjinaaki e nguurndam; ko duum haɗi mo haalande yimɓe ko o anndi koo.

Mbabba e ngaari ina ndenndatnoo mbalka. Ñande wootere julanke oo ina joodinoo hedde kulle dee o ina yeewtida e sukaaɓe makko, haa o nani ngaari ndii ina wi'a mbabba baa: «Musidɗo, mido sikki tan a weltoto so mi yeewanii ma fooftere nde njidɗaa ndee, kadi e golle seeda pawaade e dow maa! Nedɗo, oo julanke ina toppiti maa, ina loota, ina rokka ñaamde e ndiyam buubɗam.

Woni cadeele maa tan ko naɓde julanke oo so omo
dannoo. So wonaano duum gonannodaa ko huywere e
nguurndam maa fof. Kono wonaa no maa ni toppitoraa
mi, kadi kalifaandi am ndii ina metti, kono aan, ada
malaa. Midɔ leeptiree ngii jalii gila weetndoogo, mi
haɓɓee ngi e nder ɗalawma kuurɗo, midɔ seeka leydi,
ɗum ina tampina kam haa ɗum ustanii kam doole. E oon
bone fof, demoowo keedoowo caggal am oo dartintaa
fiyde mi. E tiidde pootgol jalo ngo, piyande dee ɓuri
muusde. Mi liggoto gila subaka haa naange muta, so mi
arti, ndokketee mi ko caabe joorde, de mbadaaka barke.
Hay so mi ɗaami nde wonnoo kowangel am ngel ina faadi
mbaalɗatmi ko e tuutndi am. Ko duum wadi midɔ yeeɓa
ngonka maa kaa.

Mbabba baa ne ba tay'aani haala ngaari ndii; acci ndi, ndi
haali ko ndi yidnoo koo fof haalde; nde ndi gasni, jaabii:
«Wota jaabo, innde cooloo nde ngokkadaa ndee: ada
newii sanne; ko aan jaɓi wadeede no boni, kadi a
janɗotaako. Hol ko keɓɗaa e dee doo cadeele fof, de

ngoytotodaa? Ada wara hoore maa e dow do potno daa
fooftude, do potno daa weltaade e yeeso be nganndaa
timmere maa. A wadetanooke ni, a dañatno tinnaare e
doole. So a addaama ada humee to kowangel maa too,
ada waawi jantaade? Huutor gallaadi maa, ada njaftoo
leydi, ada luura luuraali maa kulbiniidi, ko aan foti
toppiteede, hol ko saabi a haftotaako?

Ngaddante daa ko caabe joorde e hudo ko moyyaani,
salo ñaamde ko; alyo ko tan ngukkita. So a jabi feere
am ndee, maa a yi'tu mbaylaandi mum haa ngaraa jaarde
mi.»

Ngaari ndi nantii haa tiidi e ko mbabba haali koo; ndi
seedni kala ko ndi foti wad. «Musiddo am, ndi beydi
heen, mi heddataa hay huunde e ko mbi'daa kam koo yoo
mi wad, kadi a yi'at e hol mba'di mbadir mi dum.» Be
njeewti haa be njartii, ndeke julanke oo huppaaka heen
hay kelme.

Janngo mum heen subaka law, demoowo ari nanngude
ngaari ndi; haɓɓi ndi jalo sari, woni e golle mum de

wonno. Ngaari ndii noon ndi yejjitaani feere mbabba, tinnii e oon ñalngu, nde kikkiide ngari demoowo oo artiri ndi howaango mayri, ngam humde ndi toon, hono no wadatnoo, doon tan ndi wukkii e ndi duuroo e ndi luura: ndi turi gallaafi, ndi woni e bi'gol endi hawa demoowo oo. Ndi wafi kala salaare nde mbabba jannginnoo ndi. Ñalngu dewdo heen oo nde demoowo oo ari remiroyde ngaari ndii, o tawi kowangel ngel ina heewi hudo e caafe, ko addannoo ngaari ndii hanke jamma; ngaari ndii ina lelii e leydi, koyde dee ina carondiri, e ndi uuma; o sikki ko ndi ñawndi, o yurmaa ndi kadi o felliti ndi yahataa golle, o yahi haalanoyde julanke o.

Julanke oo anndi kam pewje mbabba dee ko jabaade, ndeen noon wi' yoo leeltu ba no haaniri ni: «O wi'i yah nanngoy mbabba baa mboppaa ngaari ndi hannde, ndemraa ba haa ba waasa joomi mum.» Demoowo oo jabi. Mbabba ñalli remde; tampi haa yani, nde wonnoo woowaani dee golle. E bonde, duum fof dey, mbabba

fiyaa cabbi haa banndu fof toosi taw, ndeke meeda anndu sawru.

Ngaari kañum weltii sanne, ñaami kala ko addananoo e kowangel mum, ñalli fooftu. Weltii e ko rewi ko e tinndinooje musidɗo mum; du'anii dum laabi ujunere, sabu ndee moyƴere, nde wadani dum, kadi woni e jaargol dum nde sooyinii dum ina arta. Mbabba jaabaaki hay huunde, ngaari ndii, sabu dum wontani dum ko leepte bonde. «Ko e waasde am reentaade, ba woni e haaltaade, taki mi dañde cadeele; ko mi beltinoodo, jalatnoodo daaṅaa; mido joginoo kala ko njid mi; ko miin wadi haa naatmi e oo bone; kadi so mi yi'taani feere haa mi yalta tan, ko maayde heddaanii kam.» Eba haaltoo tan haa ba hortii daro, ba yani ɗo damal howaango ɗoo, ba fadɗaa.

E oo ɗoo nokku jaagorɗo oo ina haalda Hoodere, wi' dum: «Mboomri am, a wadat no baa mbabba ni,

njogordaa ko yoolaade so a reentaaki e ko mbadda baa koo.

Hedto kam, mbi' maa mi ko yoo a deeynu laana maa, wota yeewan hoore maa maayde.

– Baaba am, Hoodere jaabii, yeru mbo kaalan daa kam oo hadataa kam wadde ko kaal mi koo, kadi mi accataa hubbinde bernde maa, so wonaa nabaam kam to laamdo too, o bama mi debbo makko.» Jaagordo oo yi' mboomri ndii ina tiidi e haala mayri, ndeen wi' ndi: «Eywa moy'yi! Wadde mbi' daa koo a woppata ko jatdaa koo, mido ma foti wadde no julanke oo wadnoo ni debbo makko; ko nii dum yahri:

E nangol julanke oo, mbabba makko fadfaama batte tampere, yidi anndude ko benni hakkunde ba e ngaari ndii. Ko duum wadi, caggal hiraande, taw lewru feeri, o yahi joodooyaade hedde di, e wondude e debbo makko.

Nde be jottii, o nani mbabba ba ina wi'a ngaari ndi: «Sehil am, mido ma naagii haalan am, hol no nganniyi daa wadde so demoowo o addanii ma ko a naam jango?

– No mbaɗat mi? Ngaari ndi jaabii; Mi jokkat tan e ko njanngin ɗaa kam koo. Mi ñawkinoo tan kadi.

–Mbabba ba wi’: Reen hoore maa no moy’yi, ina woodi feere yoolatnde ma: sabu, nde ɓe ngari e kikiide hee, mi nanii julaŋke oo ina wi’a huunde maa ɓanndu am nduu siirtii.

Ngaari ndii gidɗi: – Hol ko nanndaɗa? Wota suud am hay huunde sabu ALLA, gido am banndi am. Mbabba baa heɓɓitii wi’, Ceerno men oo haalani demoowo makko haalullaaji mettudi mi, o wi’i:

«Wadde ngaari ndi jabaani ñaam kadi ndi hortiima, njid mi ko ndi hirsee janngo. Mbaɗiren sabu ALLA, cakko ɗen teewu nguu miskineeɓe, nguru nguu noon ene nafa men, ngokkaa ñobboowo men, wadde noon wota leel noddugol buuse oo.

– Ko ɗuum njidnoo mi anndinde ma, ba ɓeydi heen; moy’yere njoganimaa mi ndee, e sehelaagal gonngal hakkunde men addanii kam reentinde ma e waasiyaade ma. E ngol so a addanaa ma caabe walla gubbal hudo,

ummo ko yaawi ngonaa heen, ko noon tan ceerno men o
ñaawirta kaa celludo, haayta ko haalnoo koo, sikke alaa a
dadat e maayde: wadde heddo hoore maa tan buri
yanjkinaade.»

Ko duum mbabba baa yeewtidi e ngaari ndii. Ndi huli
sanne haa ndi wadti huunde. Julanke oo, e hedaade
haala maɓɓe kaa haa gasi tan felkitii jaleede haa debbo
mum oo haawaa. Debbo o naamnii dum: « Haalan am hol
ko saabii ada jala dee jaleede mawde, mbela minne mi
jala.»

– Julanke oo jaabii, debbo am ada weltii e nangol jaleede
am.

– Alaa, mbo jaabii, njidf mi ko anndude sabaabu o.

– Mi waawaa rokkude ma, oon yidi, Julanke oo heɓɓitii
wi’, kono anndu tan njalat mi ko, ko mbabba men baa
haalani koo ngaari men ndii; ko heddii koo, ko sirlu mbo
mi waawaa haalande ma.

Debbo oo hebbitii wi': –Hol katdo ma anndinde mi oo sirilu?

Julanke oo jaabii, so mi haalanii ma mbo tan, ko maayde woni jaaynde am.

– Aan a yawoto kam walla, debbo oo feekii, ko kaalɗaa koo waawaa wonde goonga. So a saliima anndinde mi ko mbabba baa e ngaari ndii kaaldi koo mi woondi, e mawngu ALLA toowdo oo, en nguurdataa ko juuti ko hedditii koo.»

Nde o gasni dii konnguli, o naatoyi nder suudu, o baari e balal suudu nduu, ko doon o waali woyde, no doole makko poti. Gorko oo waali ko gooto, kadi janngo mum heen ne debbo oo dartinaani bojjii, ndeen gorko oo wi'i:

« A hersataa wadde hoore maa e ndii mbaadi; dum jaraani hay huunde. Ganndugol maa dum ina famɗi nafaa, ko duum wadi cirilu mi dum. Wadde wota beydu heen miijo. Debbo oo jaabii, mi beydat heen miijo kay, kadi mi accataa woyde so a labbinanaa ni kam dum.

Gorko oo hebbitii wi', Anndu tan kam ko mi ceertoowo e wonki am so mi jabanii ma ko natdaa koo. Debbo oo hebbitii wi'; Ko yidi fof yoo wad so ina weli Alla, mi wondaaka.

– Mi faami, gorko oo jaabii, alaa ko waawmaa nannu goonga, kadi mi anndi ko a maaydatdo e ngoo miijo maa, mi noddat sukaaɓe maa fof mbela ɓe nji' maa ada haala taw a siwa maay.»

O noddɗi sukaaɓe ɓee, o nelani esiraaɓe ɓee ngari. Nde ɓe kawriti, o haalani ɓe ko o noddiri ɓe, kamɓe fof ɓe kolli debbo ko e fenaande o joodii, omo foti ruttaade caggal; kono o luutndii ɓe fof, o wi' o maaya ɓurani mo accude ko o ndaartata koo e gorko makko. Baabiraawo e neeniraawo debbo oo kollii mo wondeno dum nafataa dum hay huunde, kono ɓe ndonki foolde mo e haala, hay e liimanaagal haalaaka teddungal. Nde sukaaɓe ɓe nji' mo, omo horanaa itteede e ngoon miijo, ɓe ngoni e goygal kamɓe fof. Julanke oo e hoore mum fiddi natti anndude hol do o woni. Omo joodii e damal suudu

makko kanƙo gooto, o felliti sakkaade wonƙi makko,
ngam danndude debbo makko, mo o yidfi haa alaa do
tolnii.

Ndeka mboomri am, Jaagordo oo jokki e haaldude e
Hoodere, julanke oo ina joginoo capande joyi gertogal e
ngoriyal gootal kaŋum e rawaandu reenatnoo ndu de.
Nde o joodinoo ndee, no mbiyruno maa mi ni, omo
miiƙoo no o foti wad, haa o yi'i rawaandu ndu ina dogal
fa'de e ngoriyal ngal, taw ngal ina ŋakkoo gertogal
gootal, o nani ndu l ngal wi'a: «Ngoriyal! Alla yamiraani
ma yaa a wuur ko juuti! A alaa gacce wadde ko mbat daa
koo hannde?»

Ngoriyal ngal sirɗini bibje, kadi, ngal ruunɗanii rawaandu
nduu:

«Batte hol duum, ngal jaabii e fitina, mi fotaani wadde
ɗum hannde e dow ŋalɗi godɗi dii? –Batte a anndaa,
rawaandu nduu heɓbitii wi', Kono anndu hannde ceerno
men ina e caɗeele mawɗe. Debbo makko yidfi ko
anndude sirɗu makko, ndeen noon ko o maayoowo, so

debbo oo anndii mo. Ko doo gede dee njahrata, kadi ko o koriido yi'tu feere haa o foola debbo makko ; sabu omo yidi mo sanne, kadi goyaali makko dii njurminii ma mo. O jogorii maay ; Enen fof en njiibiima e oo nokku; aan gooto, woni mbo sunaaki, a alaa gacce fijjude e gertoode.»

Ngoriyal ngal nani waaju rawaandu nduu: « Ceerno maa o yidaa goonga! O jogii ko debbo gooto, kadi o ronkana mbo, miin njogii mi ko capande njoyo wadatbe ko weli mi. Yoo o rutto e goonga makko, o hebat feere yaltude e do woni doo.

– Rawaandu nduu wi': Eh hol no njid daa o wada?
– Ngoriyal ngal jaabii wi': Yoo o tawoy debbo oo to suudu makko too, o udda haa tiida, o hocca sawru moyyuru, o fiya mbo laabi teemedere; mido laaba o feewtat caggal dum doon, kadi o wontata naamnaade mo ko sirla.»

Julanke oo nani ko ngoriyal ngal haali koo, doon o ummii, o hocchi sawru moyyuru, tawoyi debbo oo to nder suudu to o woyatnoo too, o uddi haa tiidi fiyi mo haa moyyi, o

heddi omo wi'a: «Yoni hanti, gorko am, yoni, accan am, mi wonta naamnaade ma huunde.»

E dñi goytaali, gorko o yi' kay debbo oo ina mimsiti wonde mo laaɓ laaɓo, ndeen o acci fiyde mo. O udditi damal ngal; esiraabe bee naati, be tawi debbo oo arti e fewre makko, be mbeltii, kadi be njuurii gorko oo ngam sabaabu hollitde debbo oo goonga. Jaagordo oo wi' kadi: «Mboomri am, ada foti leeptireede hono no debbo julanke oo fiyiraa ni.»

E oon fannu Hoodere wi': «Baaba am, tinno wota haɗ am timminde miiɗo am. Tinndol oo ɗoo debbo waawaa kam jiiɓ hakkille. Mido ma waawi haalande tinndi keewɗi godɗi ngandinat ɗi ma a fotaani luutndaade miiɗo am ngoo. Kono noon, yaafo kam, ko naamni maa mi koo, a luutndiima henndu: «So tawii gilli biɗɗo e baaba dñi

kadiima wadande mi ko mbi' mi koo, miin hoore am mi yahat hollitoyde laamdo oo hoore am.»

Ndeen mboomri ndii fooli baaba oo, o naati e jamirooje makko; kadi, ko yidi fof yoo heɓ mboomri ndii e feere mayri, o yahi, doon e doon, tawoyde Sariyaar, ngam haalande mo wondeno jamma garoowo oo, o addanat mo Hoodere.

Laamdo oo haawaa e ndii cakkudi ndi jaagordo makko wadani dum. O wi'i: «Hol no mbaawir daa sakkaade mi mboomri maa ndi njibin daa?

– Jaagordo o jaabii wi': Laamdo, ko kanke rokkiri hoore makko. Foddoore bonde fatnde dum ndee hulɓinaani dum, kadi o yidi e aduna makko ko teddungal wonde debbo maa e jamma gooto.

– Laamdo oo heɓɓiti wi': Kono wota fuuntu hoore ma, jaagordo am, janngo so ada dum adda, njid mi ko mbaraa dum doon. So a waasi noon wad, mi woondii ko mi badoowo ada maayi.

– Jaagordo o hebbitii wi’: Laamdo, bernde am tayat ko aldaa e sikke, so mi dooftimaa ma; e wonde am baaba, njaabi maa mi ko e yurminkinaare.»

Sariyaar jabani jaagordo makko, kadi wi’ dum nde sokli fof yoo addan dum mboomri ndii.

Jaagordo mawdo yahi haaltonoyde Hoodere, o weltii haa no keɓdo ko buri fof welde e aduna. O jaari baaba makko e jabande dum, kadi, e yi’de baabiraado oo ina mettini, o wi’ mo, ngam ittude mo e sunaare, o woondi o mimsataa ko o jabi koo o resondira e laamdo oo, kadi o wonat sabaabu weltinde pittaali heddiibe bee fof e nguurndam maɓbe.

O miijotoo tan ko yi’dude e laamdo oo; kono hade mo yahde, o bami miñiiko Kanje hono gondiijo makko toon, wi’ dum: Miñi am tedduɗo, mido yidi ballal e golle tiidde; mido ma ñaagi wota salano kam ngal. Baaba ina nawa mi to laamdo too ngam wonde joom suudu makko. Wota hul hay batte; hedo kam tan no feewi. So mi yottoyiima

yeeso laamɗo to, mi ñaagoto dum yoo accu ma mbaloyaa
to suudu waaytirdu too, mbela mi welto e duuso ma. So
mi hebii ndee ñaagunde, hono no njidir mi, wota yejjit
findinde mi janngo subaka law, gila fajiri seekaani, mbi'a
kam:

«Mawni am banndi am, so tawii on ñaanaaki, tinno haalan
am e tinndi maa beldi, tinndol gootol ngol nganndu ñaa,
hade dum weet.»

Mi haalan maa e ñi gootol, kadi mi yoonat jaltingol leydi
ndii fof e ndee ustaare bonnde nde ngon ñen. Kanje wi'
wadat kala ko ina wela dum so o yamirii dum.

Nde waktu lelago yonti, Jaagorɗo oo naŋi Hoodere to
galle laamɗo too, naatnoyi dum to suudu laamɗo too,
caggal duum o hooti. Booytaani laamɗo o yi' dum, o wi'
dum yoo sudit yeeso makko. O tawi paɗɗo mo alaa e
leydi makko, o yiɗi mo sanne; kono nde o yi'i omo woya,
o naamnii ko wadi.

Hoodere jaabii: «Laamɗo tedduɗo, miɗo jogii miñiraawo
debbo mbo njid mi sanne kanke ne ina yiɗi kam sanne.

Njid mi ko o waala e nduu suudu, mbele mi yi' dum kadi,
mi waynoo dum godngol. Ada yidi mi daña weltaare
rokkude dum seedanfaagal sehelaagal amen.»

Sariyaar jabi, Kanje addoyaa, hono hojom taw ari.

Laamdo leldii e Hoodere, e mbalndi toowndi tekkundi,
Kanje waali les mabbe e mbalndi daatndi.

E waktu jondo hade fajiri, Kanje fini, ummii, wadi ko
mawni mum halfinnoo dum koo. Noddi: «Mawni am
banndi am, so tawi on daanaaki, tinno haalan am e tinndi
maa beldi, tinndol gootol ngol ngandu daa, hade dum
weet. Hah goram! Waastaa ko ngol wonta watindo am
nande ko weli.»

Hoodere fotnoo ko jaabaade dum kono haaldi ko
laamdo: «Laamdo teddudo, ada yidi mi rokka oo doo miñi
am moyyo ko o naamnii koo?

Laamdo o jaabii: – 'Duum ina moyyi.»

Ndeen Hoodere wi' miñi mum debbo oo yoo hedo; hanti
doon, o feemti Sariyaar, o fuddorii ni:

Julanke galdudo ina joginoo cuudi keewdi to winnde
makko



Alors Shéhérazade lui dit : «Si vous voulez connaître la suite, il faudra m'accorder encore vingt-quatre heures avant de me livrer au bourreau». Puisque Schahriar voulait connaître la fin de l'histoire, il lui accorda encore une journée.

Ndeen noon Hoodere wi': "So odon njidi anndude kedde mum, luboree kam ñalawma timmudo ñiibirde am doo." Oon jabanimo rokki mo ñalngu kiɓɓo.